

<b>Zeitschrift:</b>	Igl Ischi : organ della Romania (Societat de Students Romontschs)
<b>Herausgeber:</b>	Romania (Societat de Students Romontschs)
<b>Band:</b>	68 (1983)
<b>Heft:</b>	20
<b>Artikel:</b>	La Surselva en in niev tractat sur dil temps miez
<b>Autor:</b>	Sobiela-Caanitz, Guiu
<b>DOI:</b>	<a href="https://doi.org/10.5169/seals-881703">https://doi.org/10.5169/seals-881703</a>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

## La Surselva en in niev tractat sur dil temps miez

da Guiu Sobiela-Caanitz

Quei che nus savein dalla Rezia denter il miez digl otgavel e la fin dil quitor dischavel tschentaner, q.v.d. da Pippin, retg dils Francs (751–768), tochen igl imperatur Carli IV (1346–1378), ei ual carschiu grazia alla lavur che gl'erudit sursilvan Martin Bundi ha elaborau e publicau cugl agid dil Fond naziunal svizzer per la perscrutazion scientifica. Il cudisch secloma *Zur Besiedlungs-und Wirtschaftsgeschichte Graubündens im Mittelalter* ed ei cumparius igl atun 1982 a Cuera tier la casa editura Calven. Tgi ch'ei seprofundaus ella *Bündnergeschichte* da Friedrich Pieth (1945) drova dacheudenvi «il Bundi» per precisar ni schizun curreger noziuns essenzialas sur dil temps feudal. Gl'autur fa diever dils progress fatgs da perscrutaders sco Georges Duby ed Emmanuel Le Roy Ladurie per contonscher novas enconuschientschas davart ils avdonts e lur derivonza, davart la runcada dils aults, davart ils ers ed il muvel. Ei fuss memia liung da resumar tenor merets quei crap miglia dalla historiografia retica. Cheu less ins mo indicar quei che partegn igl intschess dil romontsch sursilvan (Surselva e Plaun), senza emblidar las cuntradas stuschontas.

### *Da Pippin tochen Nut I*

La skizza geografica dalla pag. 528–529 muossa ils loghens avdai numnai el testament digl uestg Tello (765). Gia lu cultivav'ins la Foppa trasatras; schizun vegnas dev'ei a Sagogn, forsa er sur Glion, ed ins segava ils praus tochen sill'Alp Nagens (2000 m). Ellas valladas lateralas duvrav'ins mo la via dil Cuolm Val (pag. 26–38). La claustra da Mustér era ina largia enamiez igl uaul (pag. 104, nota 70).

Carli il Grond (768–814) ha suttaponiu la Rezia agl uorden feudal germanic. Ils vasals ed ufficials tudestgs han promoviu la runcada dils uauls e la tratga da biestga, cunzun quella dallas nuorsas. In urbari imperial da 831 alleghescha beins, buca mo ella Foppa, mobein era ella Lumnezia: per temps han ins cultivau la vegna tochen si Vella. En quella vallada steva biara glieud libra (pag. 40–56). Per «nuorsa» scriva in urbari *feda*; aschi din ins aunc adina ella Bergaglia (pag. 69) e per provenzial. Gl'onn 965 ei gl'imperatur Nut I turnaus da Ruma sur il Lucmagn cun sia

armada. Daleudenvi ei quella via transalpina vegnida duvrada pli savens, e l'abbazia da Mustér ha stimulau purs romontschs da runcar la cuntrada.

### *Mustér cloma Vallesans*

L'entschatta dil tredischavel tschentaner ha la claustra fatg vegnir Vallesans tudestgs ella Val d'Ursera e lu a Tujetsch (pag. 344–348). Cheu sebas gl'autur sin lavurs da P. Iso Müller. Ins sa buca pli dir cun Pieth: «Die bündnerische Walsersiedlung begann im Rheinwald» (*Bündnergeschichte*, pag. 63), pia pér ella secunda mesadad dil tschentaner. Bundi manegia ch'ils muntgs da Mustér hagien fatg vegnir cumpatriots er vi Sursaissa, e quei aunc all'entschatta dil tschentaner. Vallesans supponan ins empau pli tard sils aults da Sumvitg, urbarisai sut igl impuls dallas beghinias da Sogn Benedetg: Uldauna seclamava inaga Aldenga (pag. 341–342). Gest questa midada dat perdetga che certs uclauns tudestgs dalla Cadi (Sumvitg, Mutschengia, Tujetsch) ein vegni romontschai pli tard. Aschi eisi stau er vi Surcuolm: Iis pli vegls toponims documentai cumprovan che Vallesans, vegni neu da Sursaissa, han fundau leu uclivas, mo ils Romontschs da Murissen ein lu vegni vi pli numerus ed han incorporau quei territori ella Lumnezia (pag. 328).

### *Uclauns vegnan aclas*

Ins legia adina puspei che las cuntradas runcadas da Vallesans sedistinguin entras ils numerus uclauns spars enamiez ils praus. Bundi cumprova che era en in vitg romontsch sco Ruschein, documentaus gia igl onn 765, stavan ils biars avdons en uclauns tochen el quitordischavel tschentaner, e ch'ins ha adina urbarisau quelluisa; pli tard han ins bandunau ina part da quellas cuntradas (pag. 67–69 e 669–671). A Mustér, ella Val Medel ed el Tujetsch ei quella midada succedita pér entuorn il schotgavel tschentaner: Quei savein nus d.a. entras P. Placi a Spescha. Leu han ils avdons dallas uclivas debostgau memia bia per scaldar, per baghegiar e per slargar lur pastiras. Las plauncas scuvretgas, magliadas dall'erosiun, ein lu sbuadas; aschia han biars uclauns piars lur paralavinas vegetals. Bundi dat detagls davart quella decadenza en Tujetsch: Il num dil funs Scharinas muossa ch'in entir diember d'ischals carscheva sur Tschanut, e l'acla da Giuv dumbrava tschun casas avdadas dil 1768 e mo pli duas dil 1805 (pag. 90–95 e 360–361).

Cheu pretendeva la materia in slargament digl anghel visual. Quella cuorta digressiun ei gartegiada en moda instructiva era per tgi che sefatschenta cullas damondas actualas dallas cuntradas alpinas.

### *Muoth veva raschun!*

Gl'autur fixescha il tierm da sias retschercas ella secunda mesadad dil quitoridis chavel tschentaner. Daleudenvi han ils purs che runcavan mirau oravontut da recaltgar pastiras ord ils uauls per promover la tratga d'armauls (pag. 16–17 e 602). Era cun questa limitaziun fiera quella ovra ina nova glisch sill'a questiu dalla contribuziun vallesana alla naschienttscha dalla Ligia grischa, engirada 1424 «a Trun sut igl ischi». Pieth ha scret che las libertads concedidas als purs vallesans ed a lur descendants hagien dau «mächtigen Antrieb» alla midada «vom Feudalismus zur Volksherrschaft» (*Bündnergeschichte*, pag. 66). Cul «Bundi» enta maun san ins buca crer quei pli diltut. Gl'autur perscrutescha detagliadamein las culengias e prestaziuns da quels colonists. Per Val s. Pieder, per Sursaissa, pils aults da Sumvitg e dil Tujetsch mauncan ils documents. Per Valrein e per la Val Stussavgia muossa Bundi ch'ils signurs da Vaz han collocau leu Vallesans per disponer da schuldada ella uiara cugl uestg da Cuera, e che quels purs stuevan pagar e prestar tuttina bia sco ils Romontschs: Muort quella dependenza e quellas grevezias san ins buca plidar da specialas libertads vallesanas (pag. 160, 214–215, 303, 593–602).

Gia Muoth ha scret che la «sogenannte Walserfreiheit der Safier ziemlich viel kostete» (*Bündner Monatsblatt* 1901, pag. 124). La tschontscha mintgaton empau brutta dil grond poet da Breil anfl'ins buca tier il perscrutader da Sagogn. Mo nies historiograf confirma e franchescha detschartamein quei che Muoth ha viu en.

### *Per amur dalla patria*

«Il Bundi» unescha la precisiun scientifica, ils vasts horizonts e la sempladad dil stil. Quei cudisch leg'ins bunamein sco in roman, ton pli che gl'autur ha enrihiu entgins passus cun skizzas e fotografias gartegiadas che explicheschan els. Ins senta che Bundi perscrutescha per amur il vargau dil Grischun e da sias treis cuminonzas linguisticas. El meina nus da vallada a vallada sin vias e sendas, sur cuolms frequentai duront

tschentaners ed ussa bunamein emblidai. Scrivend davart ils purs medievals, fa el quitaus per quels dad oz: Els seigien mo pli paucs, memia paucs per realisar las grondas lavurs che fussen necessarias (pag. 276, nota 78). La bibliografia cumpren dudisch paginas (675–686); gl'autur ha duvrau d.a. tractats botanics, climatologics e linguistics sco era ovras davart il Tirol ed il Vorarlberg, la Vuclina ed il Tessin, Glaruna, Uri ed il Valleis. Ins sa mo giavischar cauldamein che quei cudisch fundamental vegni legius da tut quels che vulan capir co las cuntradas dil Grischun han survegniur lur fatscha dad oz.